

華嚴經普賢行願品疏卷八

唐罽賓國三藏般若奉詔譯

澄觀述疏

◎伊舍那優婆夷七住章

△第七伊舍那優婆夷，寄不退住。入於無生畢竟空理，心常行空無相願，止觀雙運緣不能壞，湛猶滄海，故名不退。文中具六。

爾時善財童子蒙善知識力。令功德身，信解圓滿。依善知識教，正念思惟。念善知識語，遞相開發。於善知識行，深生慚愧，愛樂恭敬。觀善知識心，善巧攝受，倍

益歡喜。作是念言，因善知識，令我普見一切諸佛。因善知識，令我普聞一切佛法。善知識者是我師範，示導於我一切智法普令見故。善知識者是我眼目，令我普見諸佛境界如虛空故。善知識者是我渠流，引我令入諸佛如來蓮華池故。如是思念，漸次南行。向海潮處，至彼城東。

第一依教趣求。於中分二。一念前友教。二趣求後友。前中亦二。先經家敘述。後作是念下，正陳所念。二如是思念下，趣求後友。

見普莊嚴園，眾寶垣牆，周匝圍繞。

第二見普莊嚴下，見敬諮問。於中二。一睹見。二敬問。前中亦二。一見依報。二見正報。前中謂宿因既著，現德內充。故依報精嚴，感物從化。文中，初別明嚴事。次雨散雜嚴。後凡聖欣敬。初中十事莊嚴。一寶牆圍繞，無我理周故。

一切寶樹行列莊嚴。所謂諸寶葉樹，枝葉扶疏，光彩鮮明，敷榮微妙。諸寶華樹，雨眾妙寶拘蘇摩華，發燄舒

光，布散於地。諸寶香樹，吐妙香雲，香氣氤氳，普熏十方諸佛世界。諸寶鬢樹，兩大寶鬢，莊嚴寶林，處處垂下。摩尼王樹，普雨種種大摩尼寶，遍布充滿，隨處莊嚴。一切天寶劫波衣樹，普雨種種妙寶繒綵雜色衣服，隨其所應，敷布嚴飾。寶音樂樹，出妙樂器，微風吹動，發和雅音，其音美妙，過諸天樂。諸寶資具莊嚴藏樹，各雨眾寶珍奇玩好諸莊嚴具，處處分布，以為嚴飾。其地清淨，無有高下，寬廣平坦，種種莊嚴。

二一切寶樹下，林樹行列，萬行建立故。

園中具有百萬殿堂，大摩尼寶之所合成。百萬樓閣，閻浮檀金以為校飾。百萬宮殿，毗盧遮那摩尼寶王間錯莊嚴。雲構龍蟠，延袤遠近。薨棟相承，勢如飛動。

三園中具有下，堂閣崇麗，悲智相依故。

百萬浴池，七寶合成。一切妙寶以為其岸。細妙金沙，澄布其底。七寶階道，摩尼欄楯，周匝圍繞，四面莊嚴。寶草芬芳，黃緣際畔。栴檀香水，盈滿其中。調適溫涼，隨眾生意。寶樹林間，寶渠分布。水清寶珠，周遍間錯。晝夜常流八功德水。水中多有鳧雁鴛鴦，白鶴

孔雀，迦陵頻伽，拘枳羅等，雜色諸鳥，飛集往來，遊戲出沒，整毛理翮，游泳翱翔。出妙好聲，清切和雅，猶如天樂，令人樂聞。寶多羅樹，周匝行列，覆以寶網，垂諸金鈴，微風徐搖，恆出美音。建立無數摩尼寶幢，雜寶繒幡，四面垂飾。光明普照百千由旬。

四百萬浴池下，浴沼清華，八解嚴淨故。

其中復有百萬陂池，香水湛然，清瑩澄澈。隨時堅細梅檀香泥，澄迤其下。一切上妙眾寶蓮華菡萏芬敷。大摩尼華光色照耀。

五其中復有百萬陂池下，映帶池流，福願長注故。

園中復有廣大宮殿，名莊嚴幢。海藏妙寶以為其地。種種形像悉現其中。毗琉璃寶以為其柱。閻浮檀金寶莊嚴網彌覆其上。重樓挾閣巍巍高大，猶妙金山，見者欣樂。種種勝寶以為莊嚴。光藏摩尼，恆吐妙光，以為照耀。毗盧遮那藏摩尼寶王，殊麗校飾，輝映分明。一切眾寶無價香王，咸出妙香，普熏一切。所謂具足一切最勝妙寶香王，香氣普騰，氤氳成霧。普現如意妙寶香王，香氣隨應，周聞法界。隨根覺悟妙寶香王，凡所嗅聞，諸根聰利，能於正法，精勤匪懈。

六園中復有廣大宮殿下，精嚴寶殿，居大寂滅故。

其宮殿中復有無量寶蓮華座，周迴布列。所謂光照十方妙藏摩尼寶蓮華座，毗盧遮那如意摩尼寶蓮華座，無垢藏摩尼寶蓮華座，雜寶莊嚴摩尼寶蓮華座，普門莊嚴摩尼寶蓮華座，圓光莊嚴摩尼寶蓮華座，安住海藏清淨莊嚴摩尼寶蓮華座，普燄光照摩尼寶蓮華座，金剛藏師子摩尼寶蓮華座，照耀世間摩尼寶蓮華座，如是無量摩尼寶蓮華座，一一皆以不可思議妙寶繒帶，四面垂飾。不可思議眾色摩尼，以為莊校。於宮殿中光影相照，平等莊嚴。

七其宮殿中下，敷陳寶座，安處法空故。

空中復有百萬寶帳。所謂寶衣帳，寶鬘帳，寶華帳，寶香帳，閻浮檀金帳，寶枝垂覆帳，雜寶摩尼帳，妙寶瓔珞帳，光燄金剛帳，諸天伎樂帳，象王神變帳，馬王神變帳，帝釋所坐摩尼寶帳，如是種種寶莊嚴帳，嚴飾虛空。

八空中復有百萬寶帳下，建以寶帳，大慈所覆故。

復有百萬諸大寶網，彌覆其上。所謂寶鈴網，寶蓋網，

寶身網，海藏真珠網，紺琉璃摩尼寶網，師子摩尼寶網，月愛光明摩尼寶網，一切人天種種形像寶香網，一切雜色寶冠網，一切妙寶瓔珞網，如是等網，各於其上，垂覆莊嚴。

九復有百萬諸大寶網下，羅以妙網，事理交映故。

復有百萬大寶光明而為照耀。所謂燄光摩尼寶光明，日藏摩尼寶光明，月藏摩尼寶光明，香燄摩尼寶光明，吉祥燄藏摩尼寶光明，蓮華燄藏摩尼寶光明，燄幢摩尼寶光明，大燄摩尼寶光明，遍照十方摩尼寶光明，普現香

雲莊嚴具摩尼寶光明，如是等類大寶光明而為照耀。

十復有百萬大寶光明下，曜以光明，智慧遠照故。故一事皆即法門。

常雨百萬莊嚴具雲，隨意受用。百萬隨時芬馥白栴檀香雲，普熏道場。百萬天諸妙樂雲，音聲美妙。百萬天曼陀羅華雲，而為布散。百萬諸天鬢帶雲，處處垂下，以為嚴飾。百萬天寶繒綵雲，處處垂布，以為衣服。百萬出過諸天寶瓔珞雲，莊嚴林樹，及諸樓閣。

二常雨下，雨散雜嚴。上皆純門，此辨雜門。

百萬欲界天子，欣樂瞻仰，恭敬作禮。百萬諸天采女，往修同行，常來其所，投身而下，親近敬奉。百萬諸大菩薩，恆詣道場，常樂聞法。

三百萬欲界天子下，凡聖欣敬。

時伊舍那具大人相。坐真金座。戴海藏真珠網冠，挂出過諸天真金寶釧。垂紺青髮。頂髻莊嚴。吉祥燄藏摩尼寶王以為鬘帶。毗琉璃摩尼寶以為耳璫。師子口摩尼寶

緣飾耳輪。大如意摩尼寶王以為瓔珞，莊嚴其頸。大威德帝青摩尼寶網，以覆其首。種種光燄熾盛摩尼寶網，羅覆其身。

二時伊舍那下，見正報端嚴。於中四。一正報殊倫。

百千億那由他眾生曲躬恭敬，親近供養。東方有無量眾生，來詣其所。所謂大梵天，梵輔天，梵眾天，如是色界一切諸天。欲界他化自在天，化樂天，兜率天，夜摩天，忉利天。諸龍，夜叉，乾闥婆，阿脩羅，迦樓羅，緊那羅，摩睺羅伽，及鳩槃荼，閻羅王界，大力鬼神。

乃至一切人及非人，諸王眾等。南西北方，四維上下，亦復如是。

二百千億下，十方雲仰。

其有見此優婆夷者，身病心病，種種所纏，一切邪見，障礙執著，所有惑苦，悉得除滅。速離一切諸煩惱垢。速拔一切諸見毒刺。疾破一切諸障礙山。深入無礙清淨境界。種植一切圓滿善根。長養一切善法根芽。入於一切清淨智門。普獲一切陀羅尼門。普證一切大三昧海。通達一切諸佛教海。一切諸佛廣大願門無不開發。一切

菩薩所修妙行皆悉現前。一切如來功德大海皆悉清淨。其心廣大，具足一切自在神通。其身無礙，於一切處靡所不至。普詣十方，無所依著。隨順成就一切法門。

三其有見此下，業用難測。

爾時善財童子入普莊嚴園，周遍觀察，見伊舍那優婆夷。

四爾時善財下，正睹身儀。

往詣其所。頂禮其足，繞無數匝，正立合掌。白言，聖者，我已先發阿耨多羅三藐三菩提心。而未知菩薩云何學菩薩行，云何修菩薩道。我聞聖者，善能誘誨諸菩薩眾。願為我說。

第二往詣其所下，敬問可知。

△第三時伊舍那告下，稱讚授法。略無稱讚，但有授法。於中分四，一舉法體用。二窮因淺深。三顯果久如。四彰法名字。

時伊舍那告善財言，善男子，我得菩薩一解脫門無間修習。

今初分二。先總舉所得。名在後文，至下當釋。

若有眾生暫見我身，暫聞我名，或聽我法，憶念於我，與我同住，親近隨順，供給我者，悉不唐捐。善男子，若有眾生不種善根，不為善友之所攝受，不為諸佛之所護念。雖近於我，經於多時，與我同住，終不能見。善男子，其有眾生得見我者，皆於阿耨多羅三藐三菩提獲不退轉。

二若有眾生下，別彰勝用。即以所作不空為其體用。文中三。一益物不空。二被益不空。三引證不空。初中三。初順明。次善男子若有眾生不種下，反顯。後善男子其有下，順結。

善男子，東方所有一切如來應正等覺，常來至此，處於眾寶妙師子座，為我說法。南西北方，四維上下，一切如來，悉來至此，處於寶座，為我說法。善男子，我常不離見佛聞法，與諸菩薩而共同住，不離菩薩三昧解脫。

二善男子東方下，諸佛被益不空。以與三寶常同住故，與我住者皆悉不空。

善男子，我此會眾有八萬四千億那由他，常在於此普莊嚴園，與我同住。皆於往昔與我修習一切菩薩同類行門，不相離故。一切咸於阿耨多羅三藐三菩提得不退轉。其餘眾生成久或近住此園者，一切修我同類行門，亦皆普入不退轉位。

三善男子我此會下，引證不空。現與同住皆不退故。亦

表不退方便入俗，八萬塵勞皆悉轉成波羅蜜故。所以次前明此門者，大悲利物，菩薩本故。

善財白言，聖者，發阿耨多羅三藐三菩提心為久近耶。

第二善財白言聖者下，窮因淺深。先問。

答言，善男子，我憶曾於然燈佛所，親近承事，修行梵行，恭敬供養，聞法受持。次前於離垢佛所，出家學道，受持正法。次前於星宿幢佛所，聞法修行，歡喜供養。次前於妙勝吉祥佛所。次前於蓮華德藏佛所。次前

於毗盧遮那佛所。次前於普眼佛所。次前於梵壽佛所。次前於金剛臍佛所。次前於水天佛所。善男子，我憶過去於無量劫無量生中，如是次第三十六恆河沙佛所，皆悉親近，一心承事，恭敬供養，出家學道。所受正法，所發誓願，所入三昧，所證解脫。如是一切種種行門，我皆憶持，心無廢忘。過此已往，佛智所知，非我能測。

後答。答中二。先約因緣答。後約心量答。今初。明近佛既多，功行已著。況云過此。明佛能知。而要三十六者。此有二義。一者約表。過前六位。於位位中，具修

六度。六六三十六，皆恆沙性德故。二約事說。即密示
次位。涅槃第六，四依菩薩，近佛多少，舉其八人。第
一人云，善男子，若有能於一恆河沙等諸佛世尊，發菩
提心。然後乃能於惡世中，不謗是法，愛樂是典。不能
為人分別廣說。乃至第八。若有於八恆河沙等佛所，發
菩提心。然後乃能於惡世中，不謗是經，受持讀誦，書
寫經卷。亦勸他人令得書寫等。以其一劫各加一恆。第
二人二恆，加前成三。第三三恆，加前成六。如是至
八，成三十六。

善男子，應知菩薩初發心無有量，充滿一切法界故。菩薩大悲門無有量，普入一切眾生界故。菩薩大願門無有量，究竟十方一切法界故。菩薩大慈門無有量，普覆一切眾生界故。菩薩所修行無有量，於一切剎一切劫中恆修習故。菩薩三昧力無有量，令菩薩道不退轉故。菩薩總持力無有量，能持世間隨所應聞教法海故。菩薩智明力無有量，普能悟入三世佛教巧隨順故。菩薩神通力無有量，普現十方一切所有諸剎網故。菩薩辯才力無有量，圓音一演令諸眾生隨類解故。菩薩清淨身無有量，現身普遍諸佛剎故。

後善男子應知下，約心量答。意顯發心稱法界故。亦等眾生。眾生無始，從癡有愛。菩薩發心，癡愛無初，心亦無始。

爾時善財童子白言，聖者，久如當得阿耨多羅三藐三菩提。

第三爾時善財童子下，顯果久如。先問。

答言，善男子，菩薩不為教化調伏一眾生故發菩提心，

不為教化調伏百眾生故發菩提心。不為教化調伏千眾生故發菩提心，不為教化調伏千眾生故發菩提心，乃至不為教化調伏不可說不可說轉眾生故發菩提心。不為教化成熟一世界眾生故發菩提心，乃至不為教化成熟不可說不可說轉世界眾生故發菩提心。不為教化成熟一閻浮提極微塵數世界眾生故發菩提心，不為成熟小千世界極微塵數塵數世界眾生故發菩提心，不為成熟大千世界極微塵數世界眾生故發菩提心，不為成熟三千大千世界極微塵數世界眾生故發菩提心，乃至不為教化成熟不可說不可說轉三千大千世界極微塵數世界眾生故發菩提心。復次菩薩不

為親近供養一如來故發菩提心，乃至不為親近供養不可說不可說轉佛剎極微塵數諸如來故發菩提心。不為親近供養一世界中盡未來劫次第興世諸如來故發菩提心，乃至不為親近供養不可說不可說轉世界中盡未來劫次第興世諸如來故發菩提心。不為親近供養一佛剎極微塵數世界中盡未來劫次第興世諸如來故發菩提心。復次菩薩不為嚴淨一世界故發菩提心，乃至不為嚴淨不可說不可說轉世界故發菩提心。不為嚴淨一佛剎極微塵數世界故發菩提心，乃至不為嚴淨不可說不可說轉佛剎極微塵數世界故發菩提心。

復次菩薩不為受持一如來教故發菩提心，乃至不為受持不可說不可說轉佛剎極微塵數如來教故發菩提心。復次菩薩不為修習一如來願故發菩提心，乃至不為修習不可說不可說轉佛剎極微塵數如來願故發菩提心。復次菩薩不為往一佛剎故發菩提心，乃至不為往不可說不可說轉佛剎極微塵數諸佛剎故發菩提心。復次菩薩不為莊嚴一如來眾會故發菩提心，乃至不為莊嚴不可說不可說轉佛剎極微塵數如來眾會故發菩提心。復次菩薩不為受持一佛所轉妙法輪故發菩提心，乃至不為受持不可說不可說轉佛剎極微塵數如來所轉妙法輪故發菩提心。復次菩薩不為住持一如來遺法故發菩提心，乃至不為住持不可說

不可說轉佛剎極微塵數如來遺法故發菩提心。不為住持一世界中盡未來劫次第出現如來遺法故發菩提心，乃至不為住持不可說不可說轉佛剎極微塵數世界中盡未來劫次第出現如來遺法故發菩提心。不為住持一閻浮提極微塵數世界中盡未來劫次第出現如來遺法故發菩提心，不為住持一四天下極微塵數世界中盡未來劫次第出現如來遺法故發菩提心，乃至不為住持不可說不可說轉佛剎極微塵數世界中盡未來劫次第出現如來遺法故發菩提心。

後答。答意云，心無齊限，不應復作久近之問。文中

三。一反釋。二順釋。三總結。今初分二。先別明八事。

如是略說，不為滿一佛誓願故，不為往一佛國土故，不為入一佛眾會故，不為持一佛法眼故，不為轉一佛法輪故，不為知一世界中諸劫次第故，不為知一眾生種種心海故，不為知一眾生種種根海故，不為知一眾生種種業海故，不為知一眾生種種行海故，不為知一眾生種種煩惱海故，不為知一眾生種種煩惱習氣海故，乃至不為知不可說不可說轉佛刹極微塵數眾生種種煩惱習氣海故，發菩提心。

後如是略說下，總顯。

何以故。

二何以故下，順釋。先徵前起後，何以不為。

菩薩為欲教化調伏一切眾生悉無餘故發菩提心。為欲親近供養一切諸佛悉無餘故發菩提心。為欲嚴淨一切諸佛所有刹土悉無餘故發菩提心。為欲守護一切佛教悉無餘故發菩提心。為欲隨順一切如來所行之道悉無餘故發菩提心。為欲成滿一切如來廣大誓願悉無餘故發菩提心。

欲往一切諸佛國土悉無餘故發菩提心。欲入一切諸佛眾會悉無餘故發菩提心。欲知一切諸世界中諸劫次第悉無餘故發菩提心。欲知一切眾生心海悉無餘故發菩提心。欲知一切眾生根海悉無餘故發菩提心。欲知一切眾生業海悉無餘故發菩提心。欲知一切眾生行海悉無餘故發菩提心。欲滅一切眾生諸煩惱海悉無餘故發菩提心。欲拔一切眾生煩惱習氣海悉無餘故發菩提心。

後釋意云，前皆有限，菩提之心無齊限故。此中多同發菩提心品。文中亦二。先別明。

善男子，取要言之，菩薩以如是等百萬阿僧祇方便行故發菩提心。

後善男子取要下，總顯。

善男子，菩薩行普入一切法，皆證得故。普入一切剎，悉嚴淨故。

三善男子菩薩行普入下，總結無盡。此同初地十無盡句。文中四。一總彰所作無邊，略舉二種。謂證一切

法，淨一切剎，則依正等無不皆具。

是故善男子，嚴淨一切世界盡，我願乃盡。悉知十方一切世界劫次第盡，我願乃盡。悉得十方一切諸佛功德海盡，我願乃盡。次第修集，一切菩薩精進海盡，我願乃盡。莊嚴十方一切諸佛眾會海盡，我願乃盡。悉見十方一切眾生心樂海盡，我願乃盡。悉知十方一切眾生根器海盡，我願乃盡。普觀十方一切眾生諸行海盡，我願乃盡。普竭十方一切眾生惑業海盡，我願乃盡。悉滅十方一切眾生眾苦海盡，我願乃盡。悉拔十方一切眾生習氣海盡，我願乃盡。

二是故善男子嚴淨下，假設舉盡，反顯無盡。

善男子，如是乃至百千萬億阿僧祇菩薩行門皆悉圓滿悉無餘故，我願乃滿。是故菩薩為欲成滿一切智故。為欲隨順菩薩行故。為欲嚴淨一切剎故。於一切法，勇猛勤求，無有懈怠。

三善男子如是乃至下，總結多門，顯修無懈。

善男子，應知菩薩發菩提心所修行願，所有志樂，廣大如法界，究竟如虛空。虛空究竟無窮盡故，我願究竟亦

無有盡。法界廣大無邊際故，我願廣大亦無邊際。諸眾生界究竟無盡故，我願究竟亦無有盡。

四善男子應知下，順明分量，顯其無盡。是故要無齊限。既生等無盡，成佛無期。若歷萬行，一一無限。總而收之，略有十種。一時無限，要窮三際念劫重重無盡時故。二處無限，要該十方帝網剎故。三行無限，無盡行海皆修行故。四心無限，念念常行而不足故。五智無限，了達一一稱法界故。六善巧無限，一法一行即攝無盡故。七所化無限，要化無盡眾生界故。八所斷無限，

要斷無盡自他惑故。九果無限，要盡證入無盡如來無盡德故。十平等無限，心佛眾生悉皆平等，成與不成，修與不修，曠若虛空，無取捨故。得此十意，菩提之心自然增廣。無有譬喻而能稱量。若爾，此善知識都無成耶。因此略辨成不成義，勒為四句。一以向因緣厚薄，對今無盡，則有始無成。此約悲門。二以稱法界發心，不見初相，方為真成，則無始有終。此約智說。三悲智合明，不壞相故，不妨始終。前後諸文，其例非一。四稱性之談，則無終始。故天女云，但以世俗文字數故說有三世，非謂菩提有去來今。大願精進主夜神云，不可

以生死中長短劫數分別顯示菩薩智輪。兜率偈云，眾生妄分別，某日佛成道，諸佛得菩提，實不計於日等。融斯四句，無有障礙。欲成即成，念念常成。欲不成即不成，窮未來際。故念念成佛，亦無成相。亦不住於有學之地。無障無礙，難思境也。

善財童子白言，聖者，此解脫門名為何等。

第四善財童子下，彰法名字。先問。

伊舍那言，善男子，此解脫名離憂安隱幢。

後答。名離憂安隱幢者，此有二義。一以大悲高顯，所以稱幢。其有見者，離業惑苦，不退菩提。是離憂安隱。二者即智之悲，涉苦安隱。即悲之智，多劫無憂。雙摧生死涅槃，特出凡小之外，故名幢也。

善男子，我唯知此一解脫門。如諸菩薩摩訶薩，樂欲深廣，猶如大海。容受佛法，心無厭足。志意堅固，如須彌山。所修正行，不可傾動。所作不空，如善見藥，能

除眾生煩惱重病。無礙慧身，如明淨日，滅諸眾生無明闇障。無盡大悲，猶如大地，普作一切眾生所依。福智功德，猶如好風，與諸眾生作大義利。普照世間，猶如燈燭，能生一切智慧光明。普現其身，猶如大雲，能與眾生雨寂滅法。福德光明，猶如滿月，能令見者咸得安樂。威德尊勝，猶如帝釋，悉能守護一切眾生。而我云何能知能說彼諸菩薩難思戒定無邊法海功德行願。

第四善男子我唯下，謙已推勝。

善男子，於此南方海潮之處，有一國土，名那羅素。中

有仙人，名大威猛聲。汝詣彼問，菩薩云何學菩薩行，修菩薩道。

第五善男子於此下，指示後友。海潮之處者，但約大悲，攝物無失。受童真名，故同前處。國名那羅素者，此云不懶惰。動刹持刹，觀刹詣刹，無休息故。仙人大威猛聲者，亦云無恐怖聲。出廣大遍滿音，威伏諸惡。安慰眾生，除恐怖故。童真清潔，無生無漏，仙人表之。

時善財童子禮伊舍那優婆夷足。繞無數匝。殷勤瞻仰。悲泣流淚。作是思惟。善知識者，難可出現，如優曇華。善知識者，最極難值。善知識者，難得親近。善知識者，難得承事。善知識者，難令歡喜。復作是念，得菩提難。得菩薩諸根難。淨菩薩諸根難。值同行善知識難。積集菩薩廣大善根難。寂靜菩薩廣大境界難。如理觀察菩薩行願難。隨順思惟菩薩教法難。依教修行菩薩妙行難。憶念出生菩薩善心難。速疾發起菩薩方便難。善巧增長一切智法光明難。作是念已，辭退而去。

禮辭可知。

淨空法師專集網站(簡)製作